



# Rimnada sistemática da dretg communal dalla vischnaunca da Sagogn

---

**Nummera**            **0290.02**

**Tetel**                    **Lescha per il diever da localitads**

**Ediziun**                Ediziun dils 16.04.2015

Ediziun dils 02.12.2005

Ediziun dils 28.02.1985

**Valeivel**              01.01.2016

## **Remarcas preliminaras**

Ord motivs da simplificaziun serefereschan indicaziuns da persunas, funcziuns e mistregns en questa publicaziun uffiziala mintgamai sin omisduas schlatteinas, expriu ch'ei vegn menziunau explicit zatgei auter.

Davosa correctura informala 07.11.2017 tras Thomas

## **Cuntegn**

<b>I. Principi</b>	<b>3</b>
<b>II. Procedura da damondas</b>	<b>3</b>
<b>III. Diever regular</b>	<b>5</b>
<b>IV. Diever special ed arranschaments</b>	<b>5</b>
<b>V. Taxas</b>	<b>6</b>
<b>VI. Stipulaziuns generalas</b>	<b>7</b>
<b>VII. Determinaziuns finalas</b>	<b>9</b>

Sebasond sin la costituziun communal; a. i. art. 28, lit. 2, relai la radunonza communal suandonta lescha per il diever dallas localitads ed ils implonts publics.

## I. Principi

Principi

### Art. 1

<sup>1</sup> Sebasond sin quella lescha metta la vischnaunca da Sagogn a disposiziun localitads da vischnaunca e diversas apparaturas sco era plazz da giug per diever en emprema lingia dil menaschi da scola.

<sup>2</sup> Ulteriuramein duein las localitads era vegnir nezegiadas per diever cultural, sco p.ex. seras da divertiment, concerts e representaziuns.

<sup>3</sup> Las uniuns, ils arranschaders ed organisateurs en vischnaunca han la preferenza.

## II. Procedura da damondas

Procedura da damondas

### Art. 2

<sup>1</sup> La suprastonza elegia il responsabel dalla vischnaunca per las damondas da diever da localitads, suenternumnu "responsabel".

<sup>2</sup> Damondas per il diever dallas localitads ein d'inoltrar cun ils formulars correspondentes alla canzlia communal. Lezza meina vinavon la damonda al responsabel.

<sup>3</sup> Il responsabel meina il plan d'occupaziun e decida davart las damondas inoltradas.

<sup>4</sup> Il plan d'occupaziun cun las damondas lubidas ei ligiunts per tut ils utilisaders.

Prioritad ed  
disponibilitad

### **Art. 3**

<sup>1</sup> Occurrenzas d'interess superiur sco p.ex. radunonzas communalas, exposiziuns ed activitads specialas dallas scolas han prioritad.

<sup>2</sup> Diever special ed arranschaments han per ordinari precedenza al diever regular.

<sup>3</sup> Ils utilisaders resp. organisaders ch'ein nudai el plan d'occupaziun vegnan orientai entras il responsabel ad uras davart ina tala occurrenza ch'impedescha lur diever.

<sup>4</sup> Per ordinari ein las localitads serradas per diever ils firaus e duront las vacanzas da stad.

Dispetas

### **Art. 4**

<sup>1</sup> Per reglar il diever dallas localitads per diever special ni per arranschaments san tut ils responsabels petents vegni clamai ad ina radunonza da coordinaziun. Quella ha liug el decuors dil meins settember ni tenor basegns. Il suprastont responsabel per las localitads ensemen cul responsabel convocheschan quella sesida.

<sup>2</sup> Quei vala era en cass da dispetas ni da cruschadas da termins per diever special ed arranschaments.

<sup>3</sup> Selai buc anflar ina sligiazion cuntentevla denter las partidas, decida il responsabel dalla vischnaunca davart la precedenza. El risguarda ils usits locals. Resalvau ei art. 27.

Cundiziuns  
specialas

### **Art. 5**

<sup>1</sup> Las lubientschas san vegnir colligadas cun cundiziuns specialas.

<sup>2</sup> Ei exista negin dretg per la renovaziun d'ina lubientscha.

Midadas

### **Art. 6**

<sup>1</sup> Sch'in arranschament ha buca liug ni sch'ina reservaziun per diever regular vegn midada ei quei d'annunziar immediat al responsabel.

### III. Diever regular

Damondas per diever regular

#### Art. 7

<sup>1</sup> Damondas per il diever regular pil proxim onn da scola ston vegnir inoltradas tochen la fin digl onn da scola current.

<sup>2</sup> Lubientschas per diever regular vegnan dadas sil pli bia per in onn da scola.

<sup>3</sup> Il responsabel tracta tut las damondas per diever regular avon l'entschatta digl onn da scola. La confirmaziun dalla damonda (lubientscha) duei vegnir dada tochen l'entschatta digl onn da scola. Resalvau ei la procedura tenor art. 3.

Uras da diever

#### Art. 8

<sup>1</sup> Ils utilisaders san far diever dallas localitads generalmein naven dallas 7:00 tochen las 22.30. Las localitads ein da bandunar sil pli tard 1/4 ura suenter il diever.

Survigilonza

#### Art. 9

<sup>1</sup> Arver e serrar las localitads ei exclusivamein l'obligaziun diils possessurs dallas clavs. Il responsabel sa controllar las localitads da tut temps ed annunzia eventualas constataziuns alla suprastonza communal. Las stanzas ein da mantener schubras ed en uorden.

### IV. Diever special ed arranschaments

Damondas per diever singul

#### Art. 10

<sup>1</sup> Damondas per diever special ed arranschaments ston vegnir inoltradas aschi baul sco pusseivel, mo sil pli tard in meins avon l'occasiun.

<sup>2</sup> En cass da damondas a cuort termin sa il responsabel dar la lubientscha, sche las localitads giavischadas ein libras.

- Surdada e  
surprendida  
dallas localitads
- Art. 11**
- <sup>1</sup> Las localitads duvradas vegnan surdadas cun in protocol da surdada entras il responsabel.
- <sup>2</sup> Las ordinaziuns dil responsabel ein da suandar e d'exequir. Alla fin digl arranschament pren il responsabel investa dallas localitads duvradas e rapportescha tenor il protocol da surdada.
- Installar ed  
allontanar indrez  
per las  
occurrentzas.
- Art. 12**
- <sup>1</sup> Igl organisatur ei sez responsabels per endrizzar las localitads. Tut il mobiliar ei d'allontanar immediat suenter che las produziuns ein finidas. Quei sto succeder conform alla lubientscha resp. en cunvegnientscha cul responsabel.
- Ustria
- Art. 13**
- <sup>1</sup> Per il menaschi d'ustria valan las prescripziuns dil reglament d'ustria dalla vischnaunca.
- Schubergiar
- Art. 14**
- <sup>1</sup> Tut las localitads duvradas ein da schubergiar e da returnar schubras ed en uorden. La halla ei da surdar scuada.
- <sup>2</sup> Il medem vala era pil contuorn sch'igl ei vegniu fatg diever da quel.
- <sup>3</sup> Ein las localitads buc schubergiadas cuntenteivel annunzia il responsabel las munconzas all'administraziun communal. L'administraziun adossescha ils cuosts per schubergiar dalla vischnaunca al petent resp. sa incaricar sin donn e cuost digl petent ina interpresa da schubergiar.

## V. Taxas

- Principi
- Art. 15**
- <sup>1</sup> Per l'utilisaziun dallas localitads dalla vischnaunca vegn pretendiu taxas.
- <sup>2</sup> Per uniuns, societads e gruppas dil vitg sa la suprastanza communal sminuir ni relaschar las taxas.

<sup>3</sup> En cass specials, principalmein per arranschaments cun intent public, menai tras entras auters che numnau en alinea 2, sa la suprastonza communal medemamein sminuir ni relaschar las taxas.

Uorden da taxas **Art. 16**

<sup>1</sup> La suprastonza relai in uorden da taxas che cuntegn ina survesta dallas localitads che san vegnir nezzegiadas, ensemen cun las taxas per il diever da quellas localitads.

<sup>2</sup> Las taxas vegnan fixadas entras la suprastonza communal per in onn da scola.

Contribuziuns supplementaras **Art. 17**

<sup>1</sup> La suprastonza sa stipular contribuziuns supplementaras per arranschaments extraordinaris, per restabiliments e per occurrenzas da gener privat.

## VI. Stipulaziuns generalas

Principi **Art. 18**

<sup>1</sup> Igl ei dad haver quitaun dallas localitads, d'impedir donns vid quellas, da tener uorden e da spargnar aua ed energia. Ils eschs ein da serrar cu la localitad vegn bandunada. Ils uordens da casa e da scola ein da risguardar.

<sup>2</sup> Era duront l'utilisaziun dallas localitads eis ei da tener serrau l'escha e da stizzar tut las cazzolas buca necessarias.

<sup>3</sup> La vischnaunca resp. las uniuns mettan a disposiziun divers inventari. El sto vegnir tractaus cun quitaun.

Urdeins **Art. 19**

<sup>1</sup> Ils urdeins da gimnastica astgan buca vegnir runai entuorn. Il transport e diever ha da succeder cun ils mieds prevedi.

<sup>2</sup> Ils urdeins dalla halla astgan buca vegnir duvrai el liber e sin piazzas da giug. Il suprastont da scola ni il meinascola decidan arisguard excepziuns.

Utilisaziun dils  
cundrezs

**Art. 20**

<sup>1</sup> Ils cundrezs tecnicos (regulatur da pegnas, scaffa da segironzas, etc.) astgan mo vegni manipulai da personas cumpetentas che han l'autorisaziun dil responsabel dalla vischnaunca.

Responsabladad

**Art. 21**

<sup>1</sup> La vischnaunca da Sagogn refusescha scadina responsabladad visavi ils petents e tiarzas personas.

<sup>2</sup> La suprastonza sa pretender dil petent en connex cun la lubientscha in'assicuranza da responsabladad.

<sup>3</sup> Il petent porta en scadin cass tutta responsabladad per activitads en connex cun la lubientscha per il diever dallas localitads. En special ei el responsabels per tut ils donns caschunai vid baghetgs, indrezs, mobillas, requisits, urdeins, instruments, etc. El ein medemamein responsabels per tut ils donns caschunai entras il diever enviars la vischnaunca.

Donns

**Art. 22**

<sup>1</sup> Munconzas ni donns constatai ni caschunai ein da comunicar immediat al responsabel cun il formular prevediu.

<sup>2</sup> En cass da donns entras igl organisatur sa il responsabel incaricar impressaris cun la reparatura. Ils cuosts vegnan adossai agl organisatur.

<sup>3</sup> En tut ils auters cass fa il responsabel propostas per las reparaturas alla suprastonza communal.

Fimar

**Art. 23**

<sup>1</sup> Igl ei strictamein scumandau da fimar en tut las localitads dalla vischnaunca.



- Clavs **Art. 24**  
1 Il diever dallas clavs ei reglaus egl uorden da clavs che vegn relaschus dalla suprastanza communal.  
2 En scadin cass ha mintga petent cun ina lubientscha valeivla il dretg da silmeins ina clav.  
3 L'administraziun communal ei responsabla per la repartiziun e la restituziun dallas clavs.
- Uordens supplementars **Art. 25**  
1 Uordens ni directives cumpleteschan quella lescha. Els vegnan relaschai dalla suprastanza communal tenor basegns.

## VII. Determinaziuns finalas

- Disposiziun penal **Art. 26**  
1 Tgi che violescha sapientivamein ni a moda irresponsabla las prescripziuns da questa lescha vegn castigiaus cun ina summa d'entochen 1000 francs.  
2 Ad organisaturs che risguardan buc igl uorden e las ordinaziuns dalla suprastanza ni dalla persuna responsabla dalla vischnaunca san ulteriuras lubientschas da diever vegnir refusadas, resp. la lubientscha valeivla retratga immediatamein. Quei succeda entras ina disposiziun dalla suprastanza communal.
- Mieds legals **Art. 27**  
1 Encunter decisiuns e disposiziuns dalla persuna responsabla sa vegnir inoltrau protesta enteifer 30 gis tier la suprastanza communal. Lezza decida definitivamein.
- Vigur **Art. 28**  
1 Quella lescha entra en vigur igl 1. da schaner 2016 suenter l'approbaziun entras la radunanza communal.  
2 Questa lescha remplazza tuttas leschas e reglaments anteriurs.

<b>Ediu tras</b>	Suprastonza communal		
<b>Acceptau tras</b>	radunonza communal	<b>ils</b>	28.10.2015
<b>Controllau tras</b>			
Publicaziun officiala dalla vischnaunca da Sagogn.			